



舞 點

論語

全

1085  
口仁12





歐陽脩真書

舞 點

# 論語

泉 堦南宗寺藏版



## 論語序

叙曰漢中壘校尉劉向言魯論語二十篇皆孔子弟子記諸善言也太子太傅夏侯勝前將軍蕭望之丞相韋賢及子玄成等傳之齊論語二十二篇其二十篇中章句頗多於魯論瑯琊王卿及膠東庸生昌邑中尉王吉



皆以教之故有魯論有齊論魯共王  
時嘗欲以孔子宅爲宮壞得古文論  
語齊論有問王知道多於魯論二篇  
古論亦無此二篇分堯曰下章子張  
問以爲一篇有兩子張九二十一篇  
篇次不與齊魯論同安昌侯張禹本  
受魯論兼講齊說善者從之號曰張

侯論爲世所貴包氏周氏章句出焉  
古論唯博士孔安國爲之訓說而世  
不傳至順帝時南郡太守馬融亦爲  
訓說漢末太司農鄭玄就魯論篇章  
考之齊古以爲之註近故司空陳群  
太常王肅博士周生烈皆爲義說前  
世傳受師說雖有異同不爲訓解中



問爲之訓解至于今多矣所見不同  
互有得失今集諸家之善說記其姓  
名有不安者頗爲改易名曰論語集  
解光祿大夫關內侯臣孫邕光祿大  
夫臣鄭冲散騎常侍中領軍安鄉亭  
侯臣曹羲侍中臣荀顗尚書駙馬都  
尉關內侯臣何晏等上

論語學而第一

何晏集解

子曰學而時習之不亦說乎有朋自  
遠方來不亦樂乎人不知而不愠不  
亦君子乎有子曰其爲人也孝弟而  
好犯上者鮮矣不好犯上而好作亂  
者未之有也君子務本本立而道生  
孝弟也者其仁之本與子曰巧言令



色鮮矣仁曾子曰吾日三省吾身爲  
人謀而不忠乎與朋友交而不信  
乎傳不習乎子曰道千乘之國敬事  
而信節用而愛人使民以時子曰弟  
子入則孝出則弟謹而信汎愛衆而  
親仁行有餘力則以學文子夏曰賢  
賢易色事父母能竭其力事君能致

其身與朋友交言而有信雖曰未學  
吾必謂之學矣子曰君子不重則不  
威學則不固主忠信無友不如己者  
過則勿憚改曾子曰慎終追遠民德  
歸厚矣子會問於子貢曰夫子至於  
是邦也必聞其政求之與抑與之與  
子貢曰夫子溫良恭儉讓以得之夫



子之求也其諸異乎人之求之與子曰  
父在觀其志父沒觀其行三年無改  
於父之道可謂孝矣有子曰禮之用  
和爲貴先王之道斯爲美小大由之  
有所不行知和而和不以禮節之亦  
不可行也有子曰信近於義言可復  
也恭近於禮遠耻辱也因不失其親

亦可宗也子曰君子食無求飽居無  
求安敏於事而慎於言就有道而正  
焉可謂好學也已矣子貢曰貧而無  
諂富而無驕何如子曰可也未若貧  
而樂道富而好禮者也子貢曰詩云  
如切如磋如琢如磨其斯之謂與子  
曰賜也始可與言詩已矣告諸往而



知來者也子曰不患人之不已知患  
己不知人也

論語為政第二

子曰為政以德譬如北辰居其所而  
衆星共之子曰詩三百一言以蔽之  
曰思無邪子曰導之以政齊之以刑  
民免而無恥導之以德齊之以禮有

耻且格子曰吾十有五而志乎學三  
十而立四十而不惑五十而知天命  
六十而耳順七十而縱心所欲不踰  
矩孟懿子問孝子曰無違樊遲御子  
告之曰孟孫問孝於我我對曰無違  
樊遲曰何謂也子曰生事之以禮死  
葬之以禮祭之以禮孟武伯問孝子



曰父母唯其疾之憂子游問孝子曰  
今之孝者是謂能養至於犬馬皆能  
有養不敬何以別乎子夏問孝子曰  
色難有事弟子服其勞有酒食先生  
饌曾是以爲孝乎子曰吾與回言終  
日不違如愚退而省其私亦足以發  
回也不愚子曰視其所以觀其所由

察其所安人焉廋哉人焉廋哉子曰  
溫故而知新可以爲師矣子曰君子  
不器子貢問君子子曰先行其言而  
後從之子曰君子周而不比小人比  
而不周子曰學而不思則罔思而不  
學則殆子曰攻乎異端斯害也已矣  
子曰由誨汝知之乎知之爲知之不



知為不知是知也子張學干祿子曰  
多聞闕疑慎言其餘則寡尤多見闕  
殆慎行其餘則寡悔言寡尤行寡悔  
祿在其中矣哀公問曰何為則民服  
孔子對曰舉直錯諸枉則民服舉枉  
錯諸直則民不服季康子問使民敬  
忠以勸如之何子曰臨之以莊則敬  
孝慈則忠舉善而教不能則民勸或  
謂孔子曰子奚不為政子曰書云孝  
乎惟孝友于兄弟施於有政是亦為  
政也奚其為為政也子曰人而無信  
不知其可也大車無輓小車無軛其  
何以行之哉子張問十世可知也子  
曰殷因於夏禮所損益可知也周因



於殷禮所損益可知也其或繼周者  
雖百世亦可知子曰非其鬼而祭之  
諂也見義不爲無勇

論語卷第一

論語八佾第三

孔子謂季氏八佾舞於庭是可忍也  
孰不可忍也三家者以雍徹子曰相

維辟公天子穆穆奚取於三家之堂  
子曰人而不仁如禮何人而不仁如  
樂何林放問禮之本子曰大哉問禮  
與其奢也寧儉喪與其易也寧戚子  
曰夷狄之有君不如諸夏之亡也季  
氏旅於泰山子謂冉有曰汝不能救  
與對曰不能子曰嗚呼魯謂泰山不



如林放乎子曰君子無所爭必也射  
乎揖讓而升下而飲其爭也君子子  
夏問曰巧笑倩兮美目盼兮素以爲  
絢兮何謂也子曰繪事後素曰禮後  
乎子曰起予者商也始可與言詩已  
矣子曰夏禮吾能言之杞不足徵殷  
禮吾能言之宋不足徵也文獻不足  
故也足則吾能徵之矣子曰禘自既  
灌而往者吾不欲觀之矣或問禘之  
說子曰不知也知其說者之於天下  
也其如示諸斯乎指其掌祭如在祭  
神如神在子曰吾不與祭如不祭王  
孫賈問曰與其媚於奧寧媚於竈何  
謂也子曰不然獲罪於天無所禱也



子曰周監於二代郁郁乎文哉吾從  
周子入太廟每事問或曰孰謂鄒人  
之子知禮乎入太廟每事問子聞之  
曰是禮也子曰射不主皮爲力不同  
科古之道也子貢欲去告朔之餼羊  
子曰賜也汝愛其羊我愛其禮子曰  
事君盡禮人以爲諂定公問君使臣

臣事君如之何孔子對曰君使臣以  
禮臣事君以忠子曰關雎樂而不淫  
哀而不傷哀公問社於宰我宰我對  
曰夏后氏以松殷人以栢周人以栗  
曰使民戰栗也子聞之曰成事不說  
遂事不諫既往不咎子曰管仲之器  
小哉或曰管仲儉乎曰管氏有三歸



官事不攝焉得儉乎曰然則管仲知禮乎曰邦君樹塞門管氏亦樹塞門邦君爲兩君之好有反坫管氏亦有反坫管氏而知禮孰不知禮子語魯太師樂曰樂其可知已也始作翕如也從之純如也皦如也繹如也以成儀封人請見曰君子之至於斯也吾

未嘗不得見也從者見之出曰二三子何患於喪乎天下之無道久矣天將以夫子爲木鐸子謂韶盡美矣又盡善也謂武盡美矣未盡善也子曰居上不寬爲禮不敬臨喪不哀吾何以觀之哉

論語里仁第四



子曰里仁爲美擇不處仁焉得知子曰不仁者不可以久處約不可以長處樂仁者安仁智者利仁子曰唯仁者能好人能惡人子曰苟志於仁矣無惡也子曰富與貴是人之所欲也不以其道得之不處也貧與賤是人之所惡也不以其道得之不去也君

子去仁惡乎成名君子無終食之間違仁造次必於是顛沛必於是子曰我未見好仁者惡不仁者好仁者無以尚之惡不仁者其爲仁矣不使不仁者加乎其身有能一日用其力於仁矣乎我未見力不足者蓋有之矣我未之見也子曰人之過也各於其



黨觀過斯知仁矣子曰朝聞道夕死  
可矣子曰士志於道而耻惡衣惡食  
者未足與議也子曰君子之於天下  
也無適也無莫也義之與比也子曰  
君子懷德小人懷土君子懷刑小人  
懷惠子曰放於利而行多怨子曰能  
以禮讓爲國乎何有不能以禮讓爲

國如禮何子曰不患無位患所以立  
不患莫已知求爲可知也子曰參乎  
吾道一以貫之曾子曰唯子出門人  
問曰何謂也曾子曰夫子之道忠恕  
而已矣子曰君子喻於義小人喻於  
利子曰見賢思齊焉見不賢而內自  
省也子曰事父母幾諫見志不從又



敬不違勞而不怨子曰父母在不遠  
遊遊必有方子曰三年無改於父之  
道可謂孝矣子曰父母之年不可不  
知也一則以喜一則以懼子曰古者  
言之不出耻躬之不逮也子曰以約  
失之者鮮矣子曰君子欲訥於言而  
敏於行子曰德不孤必有鄰子游曰

事君數斯辱矣朋友數斯疏矣

論語卷第二

論語公冶長第五

子謂公冶長可妻也雖在縲紲之中  
非其罪也以其子妻之子謂南容邦  
有道不廢邦無道免於刑戮以其兄  
之子妻之子謂子賤君子哉若人魯



無君子者斯焉取斯子貢問曰賜也  
如何子曰女器也曰何器也曰瑚璉  
也或曰雍也仁而不佞子曰焉用佞  
禦人以給屢憎於民不知其仁焉用  
佞子使漆彫開仕對曰吾斯之未能  
信子說子曰道不行乘桴浮于海從  
我者其由與子路聞之喜子曰由也  
好勇過我無所取材孟武伯問子路  
仁乎子曰不知也又問子曰由也千  
乘之國可使治其賦也不知其仁也  
求也何如子曰求也千室之邑百乘  
之家可使為之宰也不知其仁也赤  
也何如子曰赤也束帶立於朝可使  
與賓客言也不知其仁也子謂子貢



曰女與回也孰愈對曰賜也何敢望  
回回也聞一以知十賜也聞一以知  
二子曰弗如也吾與女弗如也宰予  
晝寢子曰朽木不可彫也糞土之牆  
不可朽也於予與何誅子曰始吾於  
人也聽其言而信其行今吾於人也  
聽其言而觀其行於予與改是子曰  
吾未見剛者或對曰申枨子曰枨也  
慾焉得剛子貢曰我不欲人之加諸  
我也吾亦欲無加諸人子曰賜也非  
爾所及也子貢曰夫子之文章可得  
而聞也夫子之言性與天道不可得  
而聞也已子路有聞未之能行唯恐  
有聞子貢問曰孔文子何以謂之文



也子曰敏而好學不耻下問是以謂  
之文子謂子產有君子之道四焉其  
行己也恭其事上也敬其養民也惠  
其使民也義子曰晏平仲善與人交  
久而人敬之子曰臧文仲居蔡山節  
藻稅何如其知也子張問曰令尹子  
文三仕爲令尹無喜色三已之無愠  
色舊令尹之政必以告新令尹何如  
子曰忠矣曰仁矣乎曰未知焉得仁  
崔子弑齊君陳文子有馬十乘棄而  
違之至於他邦則曰猶吾大夫崔子  
也違之至一邦則又曰猶吾大夫崔  
子也違之何如子曰清矣曰仁矣乎  
曰未知焉得仁季文子三思而後行



子聞之曰再思斯可矣子曰甯武子  
邦有道則知邦無道則愚其知可及  
也其愚不可及也子在陳曰歸與歸  
與吾黨之小子狂簡斐然成章不知  
所以裁之子曰伯夷叔齊不念舊惡  
怨是用希子曰孰謂微生高直或乞  
醢焉乞諸其隣而與之子曰巧言令

色足恭左丘明耻之丘亦耻之匿怨  
而友其人左丘明耻之丘亦耻之顏  
淵季路侍子曰盍各曰爾志子路曰  
願車馬衣輕裘與朋友共敝之而無  
憾顏淵曰願無伐善無施勞子路曰  
願聞子之志子曰老者安之朋友信  
之少者懷之子曰已矣乎吾未之能



見其過而內自訟者也子曰十室之  
邑必有忠信如丘者焉不如丘之好  
學也

論語雍也第六

子曰雍也可使南面仲弓問子乘伯  
子子曰可也簡仲弓曰居敬而行簡  
以臨其民不亦可乎居簡而行簡無

乃太簡乎子曰雍之言然哀公問曰  
弟子孰爲好學孔子對曰有顏回者  
好學不遷怒不貳過不幸短命死矣  
今也則亡未聞好學者也子華使於  
齊冉子爲其母請粟子曰與之釜請  
益曰與之庾冉子與之粟五秉子曰  
赤之適齊也乘肥馬衣輕裘吾聞之



也君子周急不繼富原思爲之宰與  
之粟九百辯子曰毋以與爾鄰里鄉  
黨乎子謂仲弓曰犁牛之子騂且角  
雖欲勿用山川其舍諸子曰回也其  
心三月不違仁其餘則日月至焉而  
已矣季康子問仲由可使從政也與  
子曰由也果於從政乎何有曰賜也  
可使從政也與子曰賜也達於從政  
乎何有曰求也可使從政也與子曰  
求也藝於從政乎何有季氏使閔子  
騫爲費宰閔子騫曰善爲我辭焉如  
有復我者則吾必在汶上矣伯牛有  
疾子問之自牖執其手曰亡之命矣  
夫斯人也而有斯疾也斯人也而有



斯疾也子曰賢哉回也一簞食一瓢  
飲在陋巷人不堪其憂回也不改其  
樂賢哉回也冉求曰非不說子之道  
也力不足也子曰力不足者中道而  
廢今女畫子謂子夏曰女爲君子儒  
毋爲小人儒子游爲武城宰子曰女  
得人焉耳乎哉曰有澹臺滅明者行  
不由徑非公事未嘗至於偃之室也  
子曰孟之反不伐奔而殿將入門策  
其馬曰非敢後也馬不進也子曰不  
有祝鮀之佞而有宋朝之美難乎免  
於今之世矣子曰誰能出不由戶者  
何莫由斯道也子曰質勝文則野文  
勝質則史文質彬彬然後君子子曰



人之生也直罔之生也幸而免子曰  
知之者不如好之者好之者不如樂  
之者子曰中人以上可以語上也中  
人以下不可以語上也樊遲問知子  
曰務民之義敬鬼神而遠之可謂知  
矣問仁子曰仁者先難而後獲可謂  
仁矣子曰知者樂水仁者樂山知者  
動仁者靜知者樂仁者壽子曰齊一  
變至於魯魯一變至於道子曰觚不  
觚觚哉觚哉宰我問曰仁者雖告之  
曰井有仁者焉其從之也子曰何爲  
其然也君子可逝也不可陷也可欺  
也不可罔也子曰君子博學於文約  
之以禮亦可以弗畔矣夫子見南子



子路不說夫子矢之曰予所否者天  
厭之天厭之子曰中庸之爲德也其  
至矣乎民鮮久矣子貢曰如能博施  
於民而能濟衆者何如可謂仁乎子  
曰何事於仁必也聖乎堯舜其猶病  
諸夫仁者已欲立而立人已欲達而  
達人能近取譬可謂仁之方也已

論語卷第三

論語述而第七

子曰述而不作信而好古竊比於我  
老彭子曰默而識之學而不厭誨人  
不倦何有於我哉子曰德之不脩學  
之不講聞義不能從不善不能改是  
吾憂也子之燕居申申如也夭夭如



也子曰甚矣吾衰也久矣吾不復夢  
見周公子曰志於道據於德依於仁  
遊於藝子曰自行束脩以上吾未嘗  
無誨焉子曰不憤不啓不悱不發舉  
一隅示之不以三隅反則吾不復也  
子食於有喪者之側未嘗飽也子於  
是日哭則不歌子謂顏淵曰用之則  
行舍之則藏唯我與爾有是夫子路  
曰子行三軍則誰與子曰暴虎馮河  
死而無悔者吾不與也必也臨事而  
懼好謀而成者也子曰富而可求也  
雖執鞭之士吾亦爲之如不可求從  
吾所好子之所慎齊戰疾子在齊聞  
韶樂三月不知肉味曰不圖爲樂之



至於斯也冉有曰夫子爲衛君乎子貢曰諾吾將問之入曰伯夷叔齊何人也子曰古之賢人也曰怨乎曰求仁而得仁又何怨乎出曰夫子不爲也子曰飯蔬食飲水曲肱而枕之樂亦在其中矣不義而富且貴於我如浮雲子曰加我數年五十以學易可

以無大過矣子所雅言詩書執禮皆雅言也葉公問孔子於子路子路不對子曰女奚不曰其爲人也發憤忘食樂以忘憂不知老之將至云爾子曰我非生而知之者好古敏而求之者也子不語恠力亂神子曰我三人行必得我師焉擇其善者而從之其



不善者而改之子曰天生德於予桓  
魋其如予何子曰二三子以我爲隱  
子乎吾無隱乎爾吾無行而不與二  
三子者是丘也子以四教文行忠信  
子曰聖人吾不得而見之矣得見君  
子者斯可矣子曰善人吾不得而見  
之矣得見有恆者斯可矣亡而爲有

虛而爲盈約而爲泰難乎有恆矣子  
釣而不綱弋不射宿子曰蓋有不知  
而作之者我無是也多聞擇其善者  
而從之多見而識之知之次也互鄉  
難與言童子見門人惑子曰與其進  
也不與其退也唯何甚入潔已以進  
與其潔也不保其往也子曰仁遠乎



哉我欲仁斯仁至矣陳司敗問昭公  
知禮乎孔子對曰知禮孔子退揖巫  
馬期而進之曰吾聞君子不黨君子亦  
黨乎君娶於吳爲同姓謂之吳孟子君  
而知禮孰不知禮巫馬期以告子曰丘  
也幸苟有過人必知之子與人歌而善  
必使反之而後和之子曰文莫吾猶人  
也躬行君子則吾未之有得子曰若  
聖與仁則吾豈敢抑爲之不厭誨人  
不倦則可謂云爾已矣公西華曰正  
唯弟子不能學也子疾病子路請禱  
子曰有諸子路對曰有之誅曰禱爾  
于上下神祇子曰丘之禱久矣子曰  
奢則不孫儉則固與其不孫也寧固



子曰君子坦蕩蕩小人長戚戚子溫而厲威而不猛恭而安

論語泰伯第八

子曰泰伯其可謂至德也已矣三以天下讓民無得而稱焉子曰恭而無禮則勞慎而無禮則蕙勇而無禮則

亂直而無禮則絞君子篤於親則民興於仁故舊不遺則民不偷曾子有疾召門弟子曰啓予足啓予手詩云戰戰兢兢如臨深淵如履薄冰而今而後吾知免夫小子曾子有疾孟敬子問之曾子言曰鳥之將死其鳴也哀人之將死其言也善君子所貴乎



道者三動容貌斯遠暴慢矣正顏色  
斯近信矣出辭氣斯遠鄙倍矣籩豆  
之事則有司存曾子曰以能問於不  
能以多問於寡有若無實若虛犯而  
不校昔者吾友嘗從事於斯矣曾子  
曰可以託六尺之孤可以寄百里之  
命臨大節而不可奪也君子人與君  
子人也曾子曰士不可以不弘毅任  
重而道遠仁以爲己任不亦重乎死  
而後已不亦遠乎子曰興於詩立於  
禮成於樂子曰民可使由之不可使  
知之子曰好勇疾貪亂也人而不仁  
疾之已甚亂也子曰如有周公之才  
之美使驕且吝其餘不足觀也已子



曰三年學不至於穀不易得也已子  
曰篤信好學守死善道危邦不入亂  
邦不居天下有道則見無道則隱邦  
有道貧且賤焉耻也邦無道富且貴  
焉耻也子曰不在其位不謀其政子  
曰師摯之始關雎之亂洋洋乎盈耳  
哉子曰狂而不直侗而不愿慥慥而  
不信吾不知之矣子曰學如不及猶  
恐失之子曰巍巍乎燦禹之有天下  
也而不與焉子曰大哉堯之為君也  
巍巍乎唯天為大唯堯則之蕩蕩乎  
民無能名焉巍巍乎其有成功也煥  
乎其有文章燦有臣五人而天下治  
武王曰予有亂臣十人孔子曰才難



不其然乎唐虞之際若斯為盛有婦  
人焉九人而已三分天下有其二以  
服事殷周德其可謂至德也已矣子  
曰禹吾無間然矣菲飲食而致孝乎  
鬼神惡衣服而致美乎黻冕卑宮室  
而盡力乎溝洫禹吾無間然矣

論語卷第四

論語子罕第九

子罕言利與命與仁達巷黨人曰大  
哉孔子博學而無所成名子聞之謂  
門弟子曰吾何執執御乎執射乎吾  
執御矣子曰麻冕禮也今也純儉吾  
從衆拜下禮也今拜乎上泰也雖違  
衆吾從下子絕四毋意毋必毋固毋



我子畏於匡曰文王既沒文不在茲  
乎天之將喪斯文也後死者不得與  
於斯文也天之未喪斯文也匡人其  
如予何太宰問於子貢曰夫子聖者  
與何其多能也子貢曰固天縱之將  
聖又多能也子聞之曰太宰知我者  
乎吾少也賤故多能鄙事君子多乎  
哉不多也牢曰子云吾不試故藝子  
曰吾有知乎哉無知也有鄙夫問於  
我空空如也我叩其兩端而竭焉子  
曰鳳鳥不至河不出圖吾已矣夫子  
見齊衰者冕衣裳者與瞽者見之雖  
少者必作趨之必趨顏淵喟然歎曰  
仰之弥高鑽之弥堅瞻之在前忽焉



在後夫子循循然善誘人博我以文  
約我以禮欲罷不能既竭吾才如有  
所立卓爾雖欲從之未由也已子疾  
病子路使門人爲臣病間曰久矣哉  
由之行詐也無臣而爲有臣吾誰欺  
欺天乎且予與其死於臣之手也無  
寧死於二三子之手乎且予縱不得  
大葬予死於道路乎子貢曰有美玉  
於斯韞匱而藏諸求善賈而沽諸子  
曰沽之哉沽之哉我待賈者也子欲  
居九夷或曰陋如之何子曰君子居  
之何陋之有子曰吾自衛反魯然後  
樂正雅頌各得其所子曰出則事公  
卿入則事父兄喪事不敢不勉不爲



酒困何有於我哉子在川上曰逝者  
如斯夫不舍晝夜子曰吾未見好德  
如好色者也子曰譬如爲山未成一  
簣止吾止也譬如平地雖覆一簣進  
吾往也子曰語之而不惰者其回也  
與子謂顏淵曰惜乎吾見其進也未  
見其止也子曰苗而不秀者有矣夫  
秀而不實者有矣夫子曰後生可畏  
焉知來者之不如今也四十五十而  
無聞焉斯亦不足畏也已矣子曰法  
語之言能興從乎改之爲貴巽與之  
言能無說乎繹之爲貴說而不繹從  
而不改吾未如之何也已矣子曰主  
忠信無友不如己者過則勿憚改子



曰三軍可奪帥也匹夫不可奪志也  
子曰衣敝緼袍與衣狐貉者立而不  
耻者其由也與不佞不求何用不臧  
子路終身誦之子曰是道也何足以  
臧子曰歲寒然後知松栢之後彫也  
子曰知者不惑仁者不憂勇者不懼  
子曰可與共學未可與適道可與適  
道未可與立可與立未可與權唐棣  
之華偏其反而豈不爾思室是遠而  
子曰未之思也夫何遠之有哉

論語鄉黨第十

孔子於鄉黨恂恂如也似不能言者  
其在宗廟朝廷便便言唯謹爾朝與  
下大夫言侃侃如也與上大夫言誾



閭如也君在踧踏如也與與如也君  
召使擯色勃如也足躩如也揖所與  
立左右其手衣前後襜如也趨進翼  
如也賓退必復命曰賓不顧矣入公  
門鞠躬如也如不容立不中門行不  
履闕過位色勃如也足躩如也其言  
似不足者攝齊升堂鞠躬如也屏氣  
似不息者出降一等逞顏色怡怡如  
也沒階趨進翼如也復其位踧踏如  
也執圭鞠躬如也如不勝上如揖下  
如投勃如戰色足踏踏如有循享禮  
有容色私覲愉愉如也君子不以紺  
緌飾紅紫不以爲褻服當暑袵絺綌  
必表而出緇衣羔裘素衣麕裘黃衣



狐裘褻裘長短右袂必有寢衣長一  
身有半狐貉之厚以居去喪無所不  
佩非惟裳必殺之羔裘玄冠不以弔  
吉月必朝服而朝齋必有明衣布也  
齋必變食居必遷坐食不厭精膾不  
厭細食饘而餲魚餒而肉敗不食色  
惡不食臭惡不食失飪不食不時不  
食割不正不食不得其醬不食肉雖  
多不使勝食氣唯酒無量不及亂沽  
酒市脯不食不撤薑食不多食祭於  
公不宿肉祭肉不出三日出三日不  
食之矣食不語寢不言雖蔬食菜羹  
瓜祭必齋如也席不正不坐鄉人飲  
酒杖者出斯出矣鄉人儻朝服而立



阼階問人於他邦再拜送之康子饋  
藥拜而受之曰丘未達不敢嘗廐焚  
子退朝曰傷人乎不問馬君賜食必  
正席先嘗君賜腥必熟而薦之君賜  
生必畜之侍食於君君祭先飯疾君  
視之東首加朝服挹紳君命召不俟  
駕行矣入太廟每事問朋友死無所  
歸曰於我殯朋友之饋雖車馬非祭  
肉不拜寢不尸居不容子見齊衰者  
雖狎必變見冕者與瞽者雖褻必以  
貌凶服者式之式負版者有盛饌必  
變色而作迅雷風烈必變升車必正  
立執綏車中不內顧不疾言不親指  
色斯舉矣翔而後集曰山梁雌雉時



哉時哉子路共之三嗅而作

論語卷第五

論語先進第十一

何晏集解

子曰先進於禮樂野人也後進於禮樂君子也如用之則吾從先進子曰從我於陳蔡者皆不及門者也德行顏淵閔子騫冉伯牛仲弓言語宰我子貢政事冉有季路文學子游子夏子曰回也非助我者也於吾言無所



不說子曰孝哉閔子騫人不問於其  
父母昆弟之言南容三復白圭孔子  
以其兄之子妻之季康子問弟子孰  
為好學孔子對曰有顏回者好學不  
幸短命死矣今也則亡未聞好學者  
顏淵死顏路請子之車子曰才不才  
亦各言其子也鯉也死有棺而無槨  
吾不徒行以為之槨以吾從大夫之  
後吾以不可徒行也顏淵死子曰噫  
天喪予天喪予顏淵死子哭之慟從  
者曰子慟矣子曰有慟乎非夫人之  
為慟而誰為顏淵死門人欲厚葬之  
子曰不可門人厚葬之子曰回也視  
予猶父也予不得視猶子也非我也



夫二三子也季路問事鬼神子曰未能事人焉能事鬼曰敢問死曰未知生焉知死閔子騫侍側閭閻如也子路行行如也舟子子貢侃侃如也子樂若由也不得其死然魯人爲長府閔子騫曰仍舊貫如之何何必改作子曰夫人不言言必有中子曰由

之鼓瑟奚爲於丘之門門人不敬子路子曰由也升堂矣未入於室也子貢問師與商也孰賢子曰師也過商也不及曰然則師愈與子曰過猶不及季氏富於周公而求也爲之聚斂而附益之子曰非吾徒也小子鳴鼓而攻之可也柴也愚參也魯師僻也



由嘯也子曰回也其庶乎屢空賜不  
受命而貨殖焉億則屢中子張問善  
人之道子曰不踐迹亦不入於室子  
曰論篤是與君子者乎色莊者乎子  
路問聞斯行諸子曰有父兄在如之  
何其聞斯行之冉有問聞斯行諸子  
曰聞斯行之公西華曰由也問聞斯  
行諸子曰有父兄在求也問聞斯行  
諸子曰聞斯行之赤也惑敢問子曰  
求也退故進之由也兼人故退之子  
畏於匡顏淵後子曰吾以女爲死矣  
曰子在回何敢死季子然問仲由冉  
求可謂大臣與子曰吾以子爲異之  
問曾由與求之問所謂大臣者以道



事君不可則止今由與求也可謂具  
臣矣曰然則從之者與子曰弑父與  
君亦不從也子路使子羔爲費宰子  
曰賊夫人之子子路曰有民人焉有  
社稷焉何必讀書然後爲學子曰是  
故惡夫佞者子路曾皙冉有公西華  
侍坐子曰以吾一日長乎爾無吾以

也居則曰不吾知也如或知爾則何  
以哉子路率爾而對曰千乘之國攝  
乎大國間加之以師旅因之以饑饉  
由也爲之比及三年可使有勇且知  
方也夫子哂之求爾何如對曰方六  
七十如五六十求也爲之比及三年  
可使足民如其禮樂以俟君子亦爾



何如對曰非曰敢能之願學焉宗廟  
之事如會同端章甫願爲小相焉黜  
爾何如鼓瑟希鏗爾舍瑟而作對曰  
異乎三子者之撰子曰何傷乎亦各  
言其志也曰莫春者春服旣成得冠  
者五六人童子六七人浴乎沂風乎  
舞雩詠而歸夫子喟然歎曰吾與點  
也三子者出曾皙後曾皙曰夫三子  
者之言何如子曰亦各言其志也已  
矣曰夫子何哂由也子曰爲國以禮  
其言不讓是故哂之唯求則非邦也  
與安見方六七十如五六十而非邦  
也者唯赤則非邦也與宗廟之事如  
會同非諸侯如之何赤也爲之小孰



能爲之大

論語顏淵第十二

顏淵問仁子曰克己復禮爲仁一日  
克己復禮天下歸仁焉爲仁由己而  
由人乎哉顏淵曰請問其目子曰非  
禮勿視非禮勿聽非禮勿言非禮勿  
動顏淵曰回雖不敏請事斯語矣仲

弓問仁子曰出門如見大賓使民如  
承大祭己所不欲勿施於人在邦無  
恚在家無怨仲弓曰雍雖不敏請事  
斯語矣司馬牛問仁子曰仁者其言  
也訥曰其言也訥斯可謂之仁已乎  
子曰爲之難言之得無訥乎司馬牛  
問君子子曰君子不憂不懼曰不憂



不懼斯可謂君子已乎子曰內省不  
疚夫何憂何懼司馬牛憂曰人皆有  
兄弟我獨亡子夏曰商聞之矣死生  
有命富貴在天君子敬而無失與人  
恭而有禮四海之內皆為兄弟也君  
子何患乎無兄弟也子張問明子曰  
浸潤之譖膚受之愬不行焉可謂明  
也已矣浸潤之譖膚受之愬不行焉  
可謂遠也已矣子貢問政子曰足食  
足兵使民信之矣子貢曰必不得已  
而去於斯三者何先曰去兵曰必不  
得已而去於斯二者何先曰去食自  
古皆有死民不信不立棘子城曰君  
子質而已矣何以文為子貢曰惜乎



夫子之說君子也駟不及舌文猶質也質猶文也虎豹之鞞猶犬羊之鞞哀公問於有若曰年飢用不足如之何有若對曰盍徹乎曰二吾猶不足如之何其徹也對曰百姓足君孰與不足百姓不足君孰與不足張問崇德辨惑子曰主忠信徙義崇德也愛

之欲其生惡之欲其死既欲其生又欲其死是惑也誠不以富亦祇以異齊景公問政於孔子孔子對曰君君臣臣父父子子公曰善哉信如君不君臣不臣父不父子不子雖有粟吾豈得而食諸子曰片言可以折獄者其由也與子路無宿諾子曰聽訟吾



猶人也必也使無訟乎子張問政子曰居之無倦行之以忠子曰君子博學於文約之以禮亦可以弗畔矣夫子曰君子成人之美不成人之惡小人反是季康子問政於孔子孔子對曰政者正也子帥而正孰敢不正季康子患盜問於孔子孔子對曰苟子

不欲雖賞之不竊季康子問政於孔子曰如殺無道以就有道何如孔子對曰子爲政焉用殺子欲善而民善矣君子之德風也小人之德草也草尚之風必偃子張問士何如斯可謂之達也子曰何哉爾所謂達者矣子張對曰在邦必聞在家必聞子曰是



聞也非達也夫達者質直而好義察  
言而觀色慮以下人在邦必達在家  
必達夫聞者色取仁而行違居之不  
疑在邦必聞在家必聞樊遲從遊於  
舞雩之下曰敢問崇德脩慝辨惑子  
曰善哉問先事後得非崇德與攻其  
惡毋攻人之惡非脩慝與一朝之忿

忘其身以及其親非惑與樊遲問仁  
子曰愛人問知子曰知人樊遲未達  
子曰舉直錯諸枉能使枉者直樊遲  
退見子夏曰嚮也吾見於夫子而問  
知子曰舉直錯諸枉能使枉者直何  
謂也子夏曰富哉是言乎舜有天下  
選於衆舉皋陶不仁者遠矣湯有天



下選衆舉伊尹不仁者遠矣子貢問  
友子曰忠告而善道之不可止無自  
辱焉曾子曰君子以文會友以友輔  
仁

論語卷第六

論語子路第十三

子路問政子曰先之勞之請益曰無  
倦仲弓爲季氏宰問政子曰先有司  
赦小過舉賢才曰焉知賢才而舉之  
曰舉爾所知爾所不知人其舍諸子  
路曰衛君待子而爲政子將奚先子  
曰必也正名乎子路曰有是哉子之  
迂也奚其正子曰野哉由也君子於  
其所不知蓋闕如也名不正則言不



順言不順則事不成事不成則禮樂  
不興禮樂不興則刑罰不中刑罰不  
中則民無所措手足故君子名之必  
可言也言之必可行也君子於其言  
無所苟而已矣樊遲請學稼子曰吾  
不如老農請學爲圃子曰吾不如老  
圃樊遲出子曰小人哉樊須也上好

禮則民莫敢不敬上好義則民莫敢  
不服上好信則民莫敢不用情夫如  
是則四方之民襁負其子而至矣焉  
用稼子曰誦詩三百授之以政不達  
使於四方不能專對雖多亦奚以爲  
哉子曰其身正不令而行其身不正  
雖令不從子曰魯衛之政兄弟也子



謂衛公子荆善居室始有曰苟合矣  
少有曰苟完矣富有曰苟美矣子適  
衛冉有僕子曰庶矣哉冉有曰既庶  
矣又何加焉曰富之曰既富矣又何  
加焉曰教之子曰苟有用我者期月  
而已可也三年有成子曰善人爲邦  
百年亦可以勝殘去殺矣誠哉是言

也子曰如有王者必世而後仁子曰  
苟正其身矣於從政乎何有不能正  
其身如正人何冉子退朝子曰何晏  
也對曰有政子曰其事也如有政雖  
不吾以吾其與聞之定公問一言而  
可以興邦有諸孔子對曰言不可以  
若是其幾也人之言曰爲君難爲臣



不易如知爲君之難也不幾乎一言  
而興邦乎曰一言而可喪邦有諸孔  
子對曰言不可以若是其幾也人之  
言曰予無樂乎爲君唯其言而樂莫  
予違也如其善而莫之違也不亦善  
乎如不善而莫之違也不幾乎一言  
而喪邦乎葉公問政子曰近者說遠

者來子夏爲莒父宰問政子曰毋欲  
速毋見小利欲速則不達見小利則  
大事不成葉公語孔子曰吾黨有直  
躬者其父攘羊而子證之孔子曰吾  
黨之直者異於是父爲子隱子爲父  
隱直在其中矣樊遲問仁子曰居處  
恭執事敬與人忠雖之夷狄不可棄



也子貢問曰何如斯可謂之士矣子曰行已有耻使於四方不辱君命可謂士矣曰敢問其次曰宗族稱孝焉鄉黨稱悌焉曰敢問其次曰言必信行必果硜硜然小人哉抑亦可以爲次矣曰今之從政者何如子曰噫斗筲之人何足筭也子曰不得中行而

與之必也狂狷乎狂者進取狷者有所不爲也子曰南人有言曰人而無恒不可以作巫醫善夫不恒其德或承之羞子曰不占而已矣子曰君子和而不同小人同而不和子貢問曰鄉人皆好之何如子曰未可也鄉人皆惡之何如子曰未可也不如鄉人



之善者好之其不善者惡之子曰君  
子易事而難悅也悅之不以道不悅  
也及其使人也噐也小人難事而易  
悅也悅之雖不以道悅也及其使人  
也求備焉子曰君子泰而不驕小人  
驕而不泰子曰剛毅木訥近仁子路  
問曰何如斯可謂之士矣子曰切切  
惓惓怡怡如也可謂士矣朋友切切  
惓惓兄弟怡怡如子曰善人教民七  
年亦可以即戎矣子曰以不教民戰  
是謂棄之

論語憲問第十四

憲問耻子曰邦有道穀邦無道穀耻  
也克伐怨欲不行焉可以爲仁矣子



曰可以爲難矣仁則吾不知也子曰  
士而懷居不足以爲士矣子曰邦有  
道危言危行邦無道危行言遜子曰  
有德者必有言有言者不必有德仁  
者必有勇勇者不必有仁南宮适問  
於孔子曰羿善射奭盪舟俱不得其  
死然禹稷躬稼而有天下夫子不答

南宮适出子曰君子哉若人尚德哉  
若人子曰君子而不仁者有兵夫未  
有小人而仁者也子曰愛之能勿勞  
乎忠焉能勿誨乎子曰爲命卑謹草  
創之世叔討論之行人子羽脩飾東  
里子產潤色之或問子產子曰惠人  
也問子西曰彼哉彼哉問管仲曰人



也奪伯氏駢邑三百飯蔬食沒齒無  
怨言子曰貧而無怨難富而無驕易  
子曰孟公綽爲趙魏老則優不可以  
爲滕薛大夫子路問成人曰若臧武  
仲之知公綽之不欲卞莊子之勇冉  
求之藝文之以禮樂亦可以爲成人  
矣。今之成人者何必然見利思義  
見危授命久要不忘平生之言亦可  
以爲成人矣子問公叔文子於公明  
賈曰信乎夫子不言不笑不取乎公  
明賈對曰以告者過也夫子時然後  
言人不厭其言樂然後笑人不厭其  
笑義然後取人不厭其取子曰其然  
豈其然乎子曰臧武仲以防求爲後



於魯雖曰不要君吾不信也子曰晉  
文公譎而不正齊桓公正而不譎子  
路曰桓公殺公子糾召忽死之管仲  
不死曰未仁乎子曰桓公九合諸侯  
不以兵車管仲之力也如其仁如其  
仁子貢曰管仲非仁者與桓公殺公  
子糾不能死又相之子曰管仲相桓

公霸諸侯一匡天下民至于今受其  
賜微管仲吾其被髮左衽矣豈若匹  
夫匹婦之為諒也自經於溝瀆而莫  
之知也公叔文子之臣大夫僕與文  
子同升諸公子聞之曰可以為文矣  
子曰衛靈公之無道也康子曰夫如  
是奚而不喪孔子曰仲叔圉治賓客



祝鮀治宗廟王孫賈治軍旅夫如是  
奚其喪子曰其言之不怍則其爲之  
也難也陳成子弑簡公孔子沐浴而  
朝告於哀公曰陳恒殺其君請討之  
公曰告夫二三子孔子曰以吾從大  
夫之後不敢不告也君曰告夫三子  
者之二三子告不可孔子曰以吾從

大夫之後不敢不告也子路問事君  
子曰勿欺也而犯之子曰君子上達  
小人下達子曰古之學者爲己今之  
學者爲人蘧伯玉使人於孔子孔子  
與之坐而問焉曰夫子何爲對曰夫  
子欲寡其過而未能也使子出子曰  
使乎使乎子曰不在其位不謀其政



曾子曰君子思不出其位子曰君子耻其言之過其行子曰君子道者三我無能焉仁者不憂知者不惑勇者不懼子貢曰夫子自道也子貢方人子曰賜也賢乎我夫我則不暇子曰不患人之不已知患己無能也子曰不逆詐不億不信抑亦先覺者是賢

乎微生卣謂孔子曰丘何爲是栖栖者與無乃爲佞乎孔子對曰非敢爲佞也疾固也子曰驥不稱其力稱其德也或曰以德報怨何如子曰何以報德以直報怨以德報德子曰莫我知也夫子貢曰何爲其莫知子也子曰不怨天不尤人下學而上達知我



者其天乎公伯寮愬子路於季孫子  
服景伯以告曰夫子固有惑志於公  
伯寮也吾力猶能肆諸市朝子曰道  
之將行也與命也道之將廢也與命  
也公伯寮其如命何子曰賢者辟世  
其次辟地其次辟色其次辟言子曰  
作者七人矣子路宿於石門石門晨  
門曰奚自子路曰自孔氏曰是知其  
不可而爲之者與子擊磬於衛有荷  
簣而過孔子之門者曰有心哉擊磬  
乎既而曰鄙哉硜硜乎莫已知也斯  
已而已矣深則厲淺則揭子曰果哉  
未之難矣子張曰書云高宗諒陰三  
年不言何謂也子曰何必高宗古之



人昏然君薨百官總已以聽於冢宰  
三年子曰上好禮則民易使也子路  
問君子子曰脩己以敬曰如斯而已  
乎曰脩己以安人曰如斯而已乎曰  
脩己以安百姓脩己以安百姓堯舜  
其猶病諸原壤夷俟子曰幼而不孫  
弟長而無述焉老而不死是爲賊以  
杖叩其脛闕黨童子將命或問之曰  
益者與子曰吾見其居於位也見其  
與先生並行也非求益者也欲速成  
者也

論語卷第七

論語衛靈公第十五



衛靈公問陳於孔子孔子對曰俎豆之事則嘗聞之矣軍旅之事未之學也明日遂行在陳絕糧從者病莫能興子路愠見曰君子亦窮乎子曰君子固窮小人窮斯濫矣子曰賜也女以予為多學而識之者與對曰然非與曰非也予一以貫之子曰由知德者鮮矣子曰無為而治者其舜也與夫何為哉恭己正南面而已矣子張問行子曰言忠信行篤敬雖蠻貊之邦行矣言不忠信行不篤敬雖州里行乎哉立則見其參然於前也在輿則見其倚於衡也夫然後行也子張書諸紳子曰直哉史魚邦有道如矢



邦無道如矢君子哉蘧伯玉邦有道則仕邦無道則可卷而懷之子曰可與言而不與言失人不可與言而與之言失言知者不失人亦不失言子曰志士仁人無求生以害仁有殺身以成仁子貢問爲仁子曰工欲善其事必先利其器居是邦也事其大夫之賢者友其士之仁者也顏淵問爲邦子曰行夏之時乘殷之輅服周之冕樂則韶舞放鄭聲遠佞人鄭聲淫佞人殆子曰人而無遠慮必有近憂子曰已矣乎吾未見好德如好色者也子曰臧文仲其竊位者與知柳下惠之賢而不與立也子曰躬自厚而



薄責於人則遠怨矣子曰不曰如之  
何如之何者吾未如之何也已矣子  
曰群居終日言不及義好行小慧難  
矣哉子曰君子義以為質禮以行之  
孫以出之信以成之君子哉子曰君  
子病無能焉不病人之不已知也子  
曰君子疾沒世而名不稱焉子曰君  
子求諸已小人求諸人子曰君子矜  
而不爭群而不黨子曰君子不以言  
舉人不以人廢言子貢問曰有一言  
而可以終身行之者乎子曰其恕乎  
己所不欲勿施於人子曰吾之於人  
也誰毀誰譽如有可譽者其有所誡  
矣斯民也三代之所以直道而行也



子曰吾猶及史之闕文也有馬者借  
人乘之今則亡矣夫子曰巧言亂德  
小不忍亂大謀子曰衆惡之必察焉  
衆好之必察焉子曰人能弘道非道  
弘人也子曰過而不改是謂過矣子  
曰吾嘗終日不食終夜不寢以思無  
益不如學也子曰君子謀道不謀食  
耕也餒在其中矣學也祿在其中矣  
君子憂道不憂貧也子曰知及之仁  
不能守之雖得之必失之知及之仁  
能守之不莊以蒞之則民不敬知及  
之仁能守之莊以蒞之動之不以禮  
未善也子曰君子不可小知而可大  
受也小人不可大受而可小知也



子曰民之於仁也甚於水火水火吾  
見蹈而死者矣未見蹈仁而死者也  
子曰當仁不讓於師子曰君子貞而  
不諒子曰事君敬其事而後其食子  
曰有教無類子曰道不同不相爲謀  
子曰辭達而已矣師冕見及階子曰  
階也及席也子曰席也皆坐子告之  
曰其在斯某在斯師冕出子張問曰  
與師言之道與子曰然固相師之道  
也

論語季氏第十六

季氏將伐顓臾冉有季路見於孔子  
曰季氏將有事於顓臾孔子曰求無  
乃爾是過與夫顓臾昔者先王以爲



東蒙主且在邦域之中矣是社稷之  
臣也何以爲伐舟有曰夫子欲之吾  
二臣者皆不欲也孔子曰求周任有  
言曰陳力就列不能者止危而不持  
顛而不扶則將焉用彼相矣且爾言  
過矣虎兕出於柙龜玉毀於櫝中是  
誰之過與舟有曰今夫顓臾固而近於

費今不取後世必爲子孫憂孔子曰  
求君子疾夫舍曰欲之而必更爲之  
辭丘也聞有國有家者不患寡而患  
不均不患貧而患不安蓋均無貧和  
無寡安無傾夫如是故遠人不服則  
修文德以來之既來之則安之今由  
與求也相夫子遠人不服而不能來



也邦分崩離折而不能守也而謀動  
干戈於邦內吾恐季孫之憂不在於  
顛更而在蕭牆之內也孔子曰天下  
有道則禮樂征伐自天子出天下無  
道則禮樂征伐自諸侯出自諸侯出  
蓋十世希不失矣自大夫出五世希  
不失矣陪臣執國命三世希不失矣

天下有道則政不在大夫天下有  
道則庶人不議孔子曰祿之去公  
室五世矣政逮大夫四世矣故夫三  
桓之子孫微矣孔子曰益者三友損  
者三友友直友諒友多聞益矣友便  
辟友善柔友便佞損矣孔子曰益者  
三樂損者三樂樂節禮樂樂道人之



善樂多賢友益矣樂驕樂樂佚遊樂  
宴樂損矣孔子曰侍於君子有三愆  
言未及之而言謂之躁言及之而不言  
謂之隱未見顏色而言謂之瞽孔子曰  
君子有三戒少之時血氣未定戒之  
在色及其壯也血氣方剛戒之在鬥  
及其老也血氣既衰戒之在得孔子  
曰君子有三畏畏天命畏大人畏聖  
人之言小人不知天命而不畏也狎  
大人侮聖人之言孔子曰生而知之  
者上也學而知之者次也困而學之  
又其次也困而不學民斯爲下矣孔  
子曰君子有九思視思明聽思聰色  
思溫貌思恭言思忠事思敬疑思問



忿思難見得思義孔子曰見善如不  
及見不善如探湯吾見其人矣吾聞  
其語矣隱居以求其志行義以達其道  
吾聞其語矣未見其人也齊景公有  
馬千駟死之日民無得而稱焉伯夷  
叔齊餓于首陽之下民到于今稱之  
其斯之謂與陳亢問於伯魚曰子亦  
有異聞乎對曰未也嘗獨立鯉趨而  
過庭曰學詩乎對曰未也曰不學詩  
無以言鯉退而學詩他日又獨立鯉  
趨而過庭曰學禮乎對曰未也不學  
禮無以立鯉退而學禮聞斯二矣陳  
亢退而喜曰問一得三聞詩聞禮又  
聞君子之遠其子也邦君之妻君稱



之曰夫人夫人自稱曰小童邦人稱  
之曰君夫人稱諸異邦曰寡小君異  
邦人稱之亦曰君夫人也

論語卷第八

論語陽貨第十七

陽貨欲見孔子孔子不見歸孔子豚  
孔子時其亡也而往拜之遇諸塗謂

孔子曰來予與爾言曰懷其寶而迷  
其邦可謂仁乎曰不可好從事而亟  
失時可謂知乎曰不可日月逝矣歲  
不我與孔子曰諾吾將仕矣子曰性  
相近也習相遠也子曰唯上智與下  
愚不移子之武城聞絃歌之聲夫子  
莞爾而笑曰割雞焉用牛刀子游對



曰昔者偃也聞諸夫子曰君子學道則愛人小人學道則易使也子曰二三子偃之言是也前言戲之耳公山弗擾以費畔召子欲往子路不說曰未之也已何必公山氏之之也子曰夫召我者而豈徒哉如有用我者吾其為東周乎子張問仁於孔子孔子

曰能行五者於天下為仁矣請問之曰恭寬信敏惠恭則不侮寬則得衆信則人任焉敏則有功惠則足以使人佛肸召子欲往子路曰昔者由也聞諸夫子曰親於其身為不善者君子不入佛肸以中牟畔子之往也如之何子曰然有是言也不曰堅乎磨



而不磷不曰白乎涅而不緇吾豈匏  
瓜也哉焉能繫而不食子曰由也女  
聞六言六蔽矣乎對曰未也居吾語  
汝好仁不好學其蔽也愚好知不好  
學其蔽也蕩好信不好學其蔽也賊  
好直不好學其蔽也絞好勇不好學  
其蔽也亂好剛不好學其蔽也狂子

曰小子何莫學夫詩詩可以興可以  
觀可以群可以怨邇之事父遠之事  
君多識於鳥獸草木之名子謂伯魚  
曰女爲周南召南矣乎人不爲周  
南召南其猶正牆面而立也與子曰  
禮云禮云玉帛云乎哉樂云樂云鍾  
鼓云乎哉子曰色厲而內荏譬諸小



人其猶穿窬之盜也與子曰鄉原德  
之賊也子曰道聽而塗說德之棄也  
子曰鄙夫可與事君與哉其未得之  
也患得之既得之患失之苟患失之  
無所不至矣子曰古者民有三疾今  
也或是之亡也古之狂也肆今之狂  
也蕩古之矜也廉今之矜也忿戾古  
之愚也直今之愚也詐而已矣子曰  
惡紫之奪朱也惡鄭聲之亂雅樂惡  
利口之覆邦家者子曰予欲無言子  
貢曰子如不言則小子何述焉子曰  
天何言哉四時行焉百物生焉天何  
言哉孺悲欲見孔子孔子辭之以疾  
將命者出戶取瑟而歌使之聞之



我問三年之喪期已久矣君子三年  
不為禮禮必壞三年不為樂樂必崩  
舊穀既沒新穀既升鑽燧以火期可  
已矣子曰食夫稻衣夫錦於女安乎  
曰安女安則為之夫君子之居喪食  
旨不甘聞樂不樂居處不安故不為  
也今女安則為之宰我出子曰予之

不仁也子生三年然後免於父母之  
懷夫三年之喪天下之通喪也予也  
有三年之愛於其父母乎子曰飽食  
終日無所用心難矣哉不有博奕者  
乎為之猶賢乎已子路曰君子尚勇  
乎子曰君子義以為上君子有勇而  
無義為亂小人有勇而無義為盜子



貢曰君子亦有惡乎子曰有惡惡稱  
人之惡者惡居下流而訕上者惡勇  
而無禮者惡果敢而窒者曰賜也亦  
有惡乎惡微以爲智者惡不孫以爲  
勇者惡訐以爲直者子曰唯女子與  
小人爲難養也近之則不孫遠之則  
怨子曰年四十而見惡焉其終也已

論語微子第十八

微子去之箕子爲之奴比干諫而死  
孔子曰殷有三仁焉柳下惠爲士師  
三黜人曰子未可以去乎曰直道而  
事人焉往而不三黜枉道而事人何  
必去父母之邦齊景公待孔子曰若  
季氏則吾不能以季孟之間待之曰



吾老矣不能用人也孔子行齊人婦女  
樂季桓子受之三日不朝孔子行楚  
狂接輿歌而過孔子之門曰鳳兮鳳  
兮何德之衰往者不可諫來者猶可  
追已而已而今之從政者死而孔子  
下欲與之言趨而辟之不得與之言  
長沮桀溺耜而耕孔子過之使子路

問津焉長沮曰夫執輿者為誰子路  
曰為孔丘曰是魯孔丘與曰是也  
曰是知津矣問於桀溺桀溺曰子為  
誰曰為仲由曰是魯孔丘之徒與對  
曰然曰滔滔者天下皆是也而誰以  
易之且而與其從辟人之士也豈若  
從辟世之士哉耜而不輟子路行以



告夫子憮然曰鳥獸不可與同群吾  
非斯人之徒與而誰與天下有道丘  
不與易也子路從而後遇丈人以杖  
荷蓀子路問曰子見夫子乎丈人曰  
四體不勤五穀不分孰爲夫子植其  
杖而芸子路拱而立止子路宿殺雞  
爲黍而食之見其二子焉明日子路

行以告子曰隱者也使子路反見之  
至則行矣子路曰不仕無義長幼之  
節不可廢也君臣之義如之何其廢  
之欲索其身而亂大倫君子之仕也  
行其義也道之不行已知之矣逸民  
伯夷叔齊虞仲夷逸朱張柳下惠少  
連子曰不降其志不辱其身伯夷叔



齊與謂柳下惠少連降志辱身矣言  
中倫行中慮其斯而已矣謂虞仲夷  
逸隱居放言身中清廢中權我則異  
於是無可無不可大師摯適齊亞飯  
干適楚三飯繚適蔡四飯缺適秦鼓  
方叔入於河播鞞武入於漢少師陽  
擊磬襄入于海周公語魯公曰君子

不施其親不使大臣怨乎不以故舊  
無大故則不棄也無求備於一人周  
有八士伯達伯适仲突仲忽叔夜叔  
夏季隨季騶

論語卷第九

論語子張第十九

子張曰士見危致命見得思義祭思



敬喪思哀其可已矣子張曰執德不  
弘信道不篤焉能為有焉能為亡子  
夏之門人問交於子張子張曰子夏  
云何對曰子夏曰可者與之其不可  
者距之子張曰異乎吾所聞也君子  
尊賢而容衆嘉善而矜不能我大賢  
與於人何所不容我不賢與人將拒

我如之何其距人也子夏曰雖小道  
必有可觀者焉致遠恐泥是以君子  
不為也子夏曰日知其所亡月無忘  
其所能可謂好學也已矣子夏曰博  
學而篤志切問而近思仁在其中矣  
子夏曰百工居肆以成其事君子學  
以致其道子夏曰小人之過也必文



子夏曰君子有三變望之儼然即之也溫聽其言也厲子夏曰君子信而後勞其民未信則以為厲已也信而後諫未信則以為謗已矣子夏曰大德不踰閑小德出入可也子游曰子夏之門人小子當洒掃應對進退則可矣抑末也本之則無如之何子夏

聞之曰噫言游過矣君子之道孰先傳焉孰後倦焉譬諸草木區以別矣君子之道焉可誣也有始有卒者其唯聖人乎子夏曰仕而優則學學而優則仕子游曰喪致乎哀而止子游曰吾友張也為難能也然而未仁曾子曰堂堂乎張也難與並為仁矣曾



子曰吾聞諸夫子人未有自致者也  
必也親喪乎曾子曰吾聞諸夫子孟  
莊子之孝也其他可能也其不改父  
之臣與父之政是難也孟氏使陽  
膚爲士師問於曾子曾子曰上失其  
道民散久矣如得其情則哀矜而勿  
喜子貢曰紂之不善也不如是之甚

也是以君子惡居下流天下之惡皆  
歸焉子貢曰君子之過也如日月之  
食焉過也人皆見之更也人皆仰之  
衛公孫朝問於子貢曰仲尼焉學子  
貢曰文武之道未墜於地在人賢者  
識其大者不賢者識其小者莫不有  
文武之道焉夫子焉不學而亦何常



師之有叔孫武叔語大夫於朝曰子  
貢賢於仲尼子服景伯以告子貢子  
貢曰譬諸宮牆賜之牆也及肩闔見  
室家之好夫子之牆也數仞不得其  
門而入不見宗廟之美百官之富得  
其門者或寡矣夫子之云不亦宜乎  
叔孫武叔毀仲尼子貢曰無以爲也

仲尼不可毀也他人之賢者在陵也  
猶可踰也仲尼如日月也無得而踰  
焉人雖欲自絕其何傷於日月乎多  
見其不知量也陳子禽謂子貢曰子  
爲恭也仲尼豈賢於子乎子貢曰君  
子一言以爲知一言以爲不知言不  
可不慎也夫子之不可及也猶天之



不可階而升也夫子之得邦家者所謂立之斯立道之斯行綏之斯來動之斯和其生也榮其死也哀如之何其可及也

論語堯曰第二十

堯曰咨爾舜天之曆數在爾躬允執其中四海困窮天祿永終舜亦以命

禹曰予小子履敢用玄牡敢昭告于皇皇后帝有罪不敢赦帝臣不蔽簡在帝心朕躬有罪無以萬方萬方有罪在朕躬周有大賚善人是富雖有周親不如仁人百姓有過在予一人謹權量審法度修廢官四方之政行焉興滅國繼絕世舉逸民天下之民



歸心焉所重民食喪祭寬則得衆歟  
則有功公則民說子張問政於孔子  
曰何如斯可以從政矣子曰尊五美  
屏四惡斯可以從政矣子張曰何謂  
五美子曰君子惠而不費勞而不怨  
欲而不貪泰而不驕威而不猛子張  
曰何謂惠而不費子曰因民之所利

而利之斯不亦惠而不費乎擇其可  
勞而勞之又誰怨欲仁而得仁又焉  
貪君子無衆寡無小大無敢慢斯不  
亦泰而不驕乎君子正其衣冠尊其  
瞻視儼然人望而畏之斯不亦威而  
不猛乎子張曰何謂四惡子曰不教  
而殺謂之虐不戒視成謂之暴慢令



致期謂之賊猶之與人也出內之吝  
謂之有司孔子曰不知命無以為君  
子也不知禮無以立也不知言無以  
知人也

論語卷第十

泉南有佳士厥名曰阿佐并野一日  
謂予云東京曾論之板者天下寶也  
雖然離丙丁厄而灰燼矣是可忍乎  
今要得家本以重鏤梓若何予云善  
按 應神天皇御宇典經始來 繼  
體天皇御宇五經重來自尔以降吾  
朝儒家所講習之本藏諸秘府傳於



叔世也蓋唐本有古今之異乎家本  
有損益之失乎年代寢遠不可據而  
測遂撰累葉的本以付與庶幾博雅  
君子糾焉

天文癸巳八月己亥

金紫光祿大夫拾遺清原朝臣宣賢法名宗允



